

宋

會

要

宋會要 私忌

太祖開寶九年九月三日詔應常參官及內殿起居職
官等自今刺史郎中將軍已上遇私忌請準式假一日
真宗景德三年二月二日詔文武官私忌並給假一日
忌前之夕聽還私第開寶勅文不載編勅然有司相沿
遵用至是降詔遂溥及焉 大中祥符元年十一月二
十四日龍圖閣待制陳彭年言今月二十七日上太廟
尊謚冊寶前夕宿齋其日私忌望下禮官詳定太常禮
院上言唐正元八年將作監元亘攝太尉薦饗昭德皇
后廟以私忌不受誓戒為御史劾奏今假寧令雖有給
假一日之文又緣春秋之義不以家事辭王事望令彭

年依例宿齋從之

宋會要

慶曆五年六月五日詔輔臣自今私忌給假以疆事漸
寧復舊制也

宋會要

熙寧元年十月二十八日太常禮院言參詳三司奏臣
僚忌日諸神祠生日道場事無稽據誠為非禮伏乞復
罷從之 四年三月十八日太常禮院言檢詳令勅諸
私忌給假一日忌前之夕聽還私第又按禮記祭義曰
君子有終身之喪忌日之謂也忌日親亡之日者詳父
母之忌則有禮記明文其餘親為忌於禮無聞今請凡

子為父母為人後者為所後父母並與依令給假從之

宋會要

宗學

徽宗建中靖國元年以世雄仲爰之言四月九日詔復置宗學初元祐六年宗室令鑠嘗乞建宗學及畢工以賜蔡確家至是令鑠之父知大宗正事世雄及同知大宗正事仲爰言願詔有司復以初旨故有是詔 崇寧元年十一月十二日宰臣蔡京劄子奏乞所在諸宮置學添教授逐宮各置大小二學宗子世符二學頒添置教授二員量立考選法月書季攷取其文藝可稱不戾規矩者注于籍在外住而入宮學者聽依熙寧詔書元符試法量試惟恩其學制從本司參定願入太學集學者亦聽應宗子年十歲以上入小學二十以上入大學

年不及而願入者聽從便苦無故應入學而不入或應聽讀而不聽讀者罰俸一月再犯勒住朝參三犯移自下齋即兩人不入學本宮本位尊長罰俸半月三人以上併犯者罰俸一月十人以上罰兩月重者申宗正司奏取敕裁二十九日臣僚上言竊觀宗子既以三舍考校德行藝文高下優平之法即與內外庠序事體一同緣本司長貳並係宗室臣僚欲乞諸宮學別以儒臣專提舉學事或選宗正寺長貳專以學事隸之庶使上下相維幾察異論官師無苟簡之弊以稱陛下敦叙教養甚盛之舉詔諸宮學差宗正寺長貳提舉王海置院別都增學官即崇寧以知宗同知宗兼領學事三年五

月置睦親宅北宅廣親宅大學小學各一員廣親北宅睦親西宅周王宮大學兼領小學各二員五年改稱某王宮子博士位子博士之上靖康之亂宗學遂廢諸宮博士共十三員立三舍法事類合璧宋明皆監之外復立宗學始創於神宗至崇觀而大備中更禍亂宗學遂廢南渡草創為屋數楹暫寓臨安之睦親宅更化之後以羅仲舒范楷奏請有旨遷睦親宅於他所而盡拓地基以為學焉大觀元年十一月承議郎充睦親宅宗子博士勾祖武劄子伏見宗學昨已蒙朝廷增復博士員缺然一學規矩責在正錄舉行今止以宗學為之其學生類皆同官見屬糾正申舉之際未免或有牽制

欲乞凡當宮學生及一百以上處並依大學辟廡法差命官正錄各一員仍以宗子正錄副之從之十一月八日南京外宗正司狀承崇寧四年十月十四日敕内外宮學正錄闕並從朝廷差命官續承崇寧五年二月四日敕内外宮學正錄可依舊條差補所有差命官指揮更不施行二年三月戊午兩官仲瑑唐突言宮學無官宗子三經公試不中乞特與升補內舍有詔放罪而大宗正司執政當行故也八月三十日詔曰先王賓興萬民與教國子之制比嘗考之其義不同大司徒以六德教萬民而師氏教國子則三德以三行教萬民而於國子則三行而已詳於訓士而畧於治親所教之道殊

親親之恩異故也崇寧教養宗子法雖未究盡然異於天下之士者親親之恩有在乎是今雖嘗做辟廱大學修立制度可參酌輕重降於內外學法使易以跋及樂於勸向以示悖宗親厚之意宋史長編九月己未御筆宗室升貢試或不中自今許入國子學初學制局議違歸不學止以為庶士既得辟廱不可薄於宗親故有是詔三年三月十六日朝散郎禮部尚書鄭允中奏乞同宗子中上舍第而文行有稱者為宗子學官庶幾各從其類易以表率從之九月二十九日御寶批知大宗正同知大宗正事官既為屬籍之長兼見領管勾宗子學事可並依宗正寺少卿例詣學提按及簽書本學職

事 四年八月乙酉詔宗子升補上舍係比舊日宗室
應舉之人解其赴貢士舉試係比省試今不經殿試便
分三等命官錄熙豐未有此法可依貢士已降指揮並
留俟殿試其上中等人遇唱名取旨 閏八月甲寅工
部尚書李昉南上宗子大小學教令格式二十二冊詔
付禮部頒降 政和二年四月庚戌禮部言大觀三年
貢士并宗子上舍與進士同釋褐就瓊林苑賜宴令合
取旨詔宴就辟雍仍用雅樂差知舉蔡疑押宴 四年
小學生近一千人分十齋十二月頒小學條制立三舍
法 五年五月試小學生優等四人賜上舍童子出身政
和學制宗正卿總治宗子大小學之政令少卿貳之

重和元年十一月九日臣僚言諸官學官承前弊不暇升堂則例皆傳送口義令諸齋抄錄以爲文具而已餘事廢弛不言可知欲乞嚴賜誡勅詔令大宗正司檢察措置今看詳宗子學官不升堂講書合從違令答士科罪今承朝旨稱有廢慢重寘以法欲宗子學博士應講書不集衆升堂者增從杖八十科罪從之宣和二年八月五日中書奏元豐法在京小學止有就傳初筮兩齋無直學等於是罷二舍教諭選太學生爲之三年六月二十七日增置西南外宗院教授高宗紹興三年六月二十三日知大宗正丞謝伋言臣嘗讀真宗皇帝實錄咸平間使輔臣選醇儒授南北宅將軍以經義

其後常選擇名德之士以充其官比年以來選用寢輕至或久闕正員簿書期會之吏得以攝事使宗室何視以為模範哉其大小學教官欲望明詔三省選擇儒臣以專訓導詔各選一員 四年始置諸王宮大小學教授二員隆興省其一 五年四月七日同知大宗正事士儼言檢準尚書省劄子知大宗正事仲琛申請數內一項諸宮自來差教授官一十三員記室一員即今全闕今先乞差大學教授二人小學教授二人伏望差注其人從請給並依在京法有旨依仍令吏部討論條具申尚書省本部將紹興重修格檢揭即無宗子大小學教授注格按牘取到大宗正司狀官學教授後來改為

宗子博士序位立班在國子博士之上請給人從視大學博士契勘在京係諸王宮大小學教授今欲依大宗正司供到事理施行從之 二十九日秉義郎趙公智言趙不見先係從義郎宗學內舍生有中等校定作免解人數有旨特與換授宣義郎公智先係宗學外舍陞補內舍若比大學罷三舍恩例合得免解至依趙不凡例換授文資詔趙公知特換授左承奉郎 六月七日禮部言諸王宮大小學教授錢觀復奏乞復置宮學送禮部與所屬曹部同共勘當申尚書省今據國子監狀祖宗朝凡宗室事大宗正司治之玉牒之類宗正寺掌之政和學制書宗正卿總治宗子大小學之政令而掌

之以卿貳卿之職事崇寧以來知大宗正司同知大宗正事兼領主管提按簽書學事今來宮學所隸宗正司與宗正寺即本監難以指定欲乞取會逐處指定施行勘會諸宮教授自嘉祐以來設置仍立講書課試規罰之法累經兵火元立一司條法已是散失見今國子監有政和學制內該載宗學法令有簡便可行於今者欲就國子監關借抄錄奉行所有宗學一司條法欲乞搜訪以備採擇合行事目條畫遵守從之 七月六日太常寺言大宗正司關楫已修蓋大小學了當本寺欲乞今後每遇太廟別廟大祀所差宗室充獻言行事前三日致齋欲依本司條法於學舍致齋內前一日於本廟

致齋欲乞申明行下從之 八月十九日諸王宮大小
學教授錢觀復等言今具本學條畫事件 一宗子昔
分為六宅凡宅又各有學學皆有官今行在惟有睦親
宅一處專以居南班官其子弟之係外官者無幾所餘
外官無宅散在民居邸店者不可勝數欲盡令入學則
睦親宅見在散居五間除教官二員各得直舍屋一間
外餘講堂三間更無齋舍可以容處欲各就宗子所在
講說訓導非特與民間混雜所居褊隘又散漫不一難
以遍詣欲乞就睦親宅附近踏逐空閑地基增廣學舍
令應干到行在宗子皆得入學庶使內外宗子均被教
養 一契勘國朝自嘉祐三年詔諸宮置教授治平元

年添置講書及課試規罰之法其制未備至崇寧大觀間諸宮各置博士十三員立為三舍陞補與貢士一體其法甚詳今創復宮學止是行在及紹興府南班宮邸各置教授二員嘉祐治平講書課試規罰之法已經兵火無有生者今乞刪修見今合行條制付本學以憑遵守施行一宗學法合輪講書今來宮學大學生人數至少年格雖及而經書全未通誦尚須點授若遽以大經義講說則義難開曉恐成躡等欲乞且講論孟可使易曉候至稍通經旨仍舊大小經輪講庶以漸進不為文具其小學生日逐點授或作詩對所有大學生年雖應格學未成就亦乞且依小學例點授功課其有學業

稍通自依大學法並從之 十二年七月時因有宗子
犯法已卯上謂宰執曰見宗學教官今日率宗子講書
作功課庶使用心不為惡事十月己亥上謂宰執曰今
後宗子許令所在入學令與寒士同處仍別作齋庶盡
變積習異時文行有可取也 十三年六月十九日西
外宗正司言據宗學教授李若虎申教宗院宗學教授
與諸州教授事體一同所有就任磨勘及薦舉等事乞
依諸州教授條例施行從之 七月二十六日詔西外
教宗院宗學教授許禮部國子監長貳依諸州教授體
例通行薦舉 九月二日同知大宗正事士太言臣仰
惟朝廷崇建大學教養多士陞黜之法備具甚盛典也

而宗子亦蒙遴選師儒置學教導其間秀俊雖可取之人若未加旌別或不能自達欲望許令宗學教官如宗子有文藝可稱行己修潔者保明以聞乞量材升擢或賜召試其文理優長者特與補授文資庶幾人人知勸將見異材間出以副聖主樂育之意上曰若令保舉恐其間有人情可令保明申尚書省取旨引試庶得實才也 十二月五日禮部言知南外宗正事士諒保明到宗子學諭李幹在學實及二年委是文藝卓然衆所推譽乞與免解詔免文解一次 二十七日禮部言昨在京日有官學教養在京睦親等宅宗室在外就西南兩外宗學教養每遇科場不以己未有官並聽赴國子監

轉運司請解及無官非袒免親許赴國子監取應本部
契勘除内外宗室須應舉取應自合遵依見行條法指
揮外昨在京口宗子學法係行三舍後於紹興五年六
月內復置諸王宮大小學所有見在學教養宗子許依
進士科舉法取應未出官者亦許入學聽讀實及一年
方許參選出官願就舉者聽從之 十四年二月二十
五日戶禮部言準同知大宗正事士獨奏乞應行朝在
外居住有官無官宗子願入學者並許令赴宮學仍依
州學例每日量給飲食契勘今來應有官無官宗子並
許入學切慮本學難以辨驗指實欲乞遇有入學宗子
須先經由大宗正司陳乞令本司審實保明開具年甲

三代宮院報宗正寺行下官學照會收管兼契勘在京
宗子分隸六學教養大小生員各有立定人額今欲置
大小學職事人各五人大學生五十人小學生四十人
通一百人為額仍將入學宗子並依州學例日給飲食
內在京六學宗子學制有學規齋規并小學規并係增
損大學之制今來合行申嚴遵守施行並從之 十一
月一日禮部言諸王宮大小學祖宗朝睦親等宅宗子
學舊制教授崇寧四年改為博士紹興五年復置諸王
宮大小學教授教導諸宮院宗子官學教授與宗子博
士所掌事體一同見今遵守今來乞復正錄按政和學
制書所載宗子學正錄以尊卑序差即得尊而不任事

者聽以次選本學欲乞候修學舍就緒日依舊制差置
正錄本部欲依所乞從之先是趙不溢乞復置宗學
博士正錄於是禮部看詳從其請也文獻通考十四年
建於臨安學生以百員為額大學生五十人小學生四
十人職事各五人置諸王宮大小學教授一員在學者
皆南宮北宅子孫若親賢宅近屬則別選館職以教授
焉十五年八月六日諸王宮大小學教授陳孝恭言臣
切觀陛下肇新大學教養之法莫不備舉每歲春秋上
丁釋奠自大學以至郡邑蓬豆簋簋之陳登降揖遜之
節威儀孔昭神明顧享儒者榮觀莫此為甚然臣切謂
陛下親睦九族建宗子學置教授官而每歲宗子不獲

與上丁釋奠之列以觀禮文之盛誠闕典也欲望睿旨
應行在宗子每遇春秋釋奠並令散齋致齋就太學倍
位所有諸路宗子隨其寄遇郡邑亦令與此盛禮庶幾
養成天枝益見秀傑豈小補哉從之十六年六月八日
詔宗子不愼與免文解一次以西外宗正司言在學二
年文藝卓然衆所推譽故也十七年七月十日詔宗
子子渙特與免文解一次以西外宗正司言其在學日
久文藝為衆所推故也二十年五月七日詔宗子學
諭公迴特與免文解一次以知南外宗正事士浯言公
迴在學實及二年文藝卓然衆所推譽故也二十六
年六月十六日通判泉州黃祖舜言仰惟國家祖功宗

德子孫熾昌懷負才能固不乏人然不加之訓導則雖有忠如朱虛賢如河間德行如東平將無以自見矣臣竊見仁宗皇帝朝以吳充為吳王宮教授方正清謹名重一時嘗於宗司闕除聽事施設講席教導有方秩滿作宗室六歲以獻當時命錄賜南北宮縉紳榮之今西外南外教宗院雖有教授未嘗講說宗子無課程之規徒事虛文無益治道臣愚欲乞月今以往謹擇教官以經明行修之士充選間日講說課習程試如大學之制歲終以諸生程文真卷繳申禮部下太學司業博士省詳詞理優長者與免文解文學超異者特與推恩教授訓導有功亦乞量加褒擢以此激勸庶有成效仰副陛下

下悼忠睦族之意從之 二十七年六月二十五日諸王宮大小學教授陳崇言睦親宅南班官及其子弟講解傳授舊制具存向緣創復之初有司建請以未能通經乞且講論孟至今逾二十年雅講此二書周而復始學官失於申明無有以六經講授者况經學校科舉正以經術為先而宗學講經自有成法特未舉而行之耳欲望令有司檢會宗學法將大小經仍舊講從之 八月四日宗正丞吳景偁言伏覩陛下偃武修文崇儒重道學檢之設編于幅員惟是宮學興復既已歷年止有敝屋數間蕭然環堵釋菜無殿講說無堂逼近通衢又無廊廡師儒齋几卑隘淺陋主徒誦讀游息之地抑又

可知豈有仙源流衍英材衆多傳經肄業之所乃苟簡如此邪適者學官嘗有陳請事下有司行移會間猶未營造意者官司財用有限力未能及欲望捐內府之錢建立黌舍以幸宗室乞於令宮學之側令臨安府計置度量修葺從之 三十年孝宗為建王時光宗與莊文魏王就傳以王十明兼小學教授 孝宗乾道二年十二月十五日知西外宗正事趙子英言西外敦宗院宗學生公說等狀乞依南外宗學已得指揮於宗子月給將仕郎綾紙內取撥一道變轉價錢專充宗學錢糧乞下福州依例施行從之 淳熙元年六月十五日西外宗正司言訓武郎主管台州崇道觀趙不塵因子姓極

擾市戶強取民財奉旨不塵善誘送西外善評汰資送
南外宗學教導今據宗學教授陶敏功申不塵年六十
六見患風疾竊慮醫藥飲食之類不便別教不測欲乞
許令自便從之 三年九月二日知南外宗正司趙不
敵言乞依西外宗司公使庫歲給錢數每次給降不理
選限將仕郎綾紙二道下泉州轉變見錢三千貫文省
付本司充三歲公使仍自今年為始從之 四年五月
二十一日詔西南兩外司宗子元犯兇暴殺人至死永
鎖閉拘管之人遇恩赦別行取旨外其不帶永字已經
展年人量元犯經重如已經赦合行放免者與放免從
判太宗正事嗣濮王士輅請也 十二月十九日南外

宗正司言本司昨緣住罷賣酒公使匱乏無可支遣乞
依西外宗正司例歲給度牒詔戶禮部於泉州合起發
錢內支撥三千貫其度牒更不給降 五年閏六月五
日詔大宗正司諸宮院醫官特令更添置小方脉一員
共三員宿直祇應乾道五年八月十三日同知大宗正
事士錢言元差宿直醫官三員近降指揮減罷止差小
方脉一員乞依紹興府大宗正行司例更存留大方脉
一員至是本司復請添置故有是命 六年三月二十
八日新除右監門衛大將軍忠州防禦使權知大宗正
事不息言蒙恩特換南班有司創置合陳請事件 一
不息係外官換授南班格法不同所有請給支賜乞依

累政宗官已得指揮依舊法全給 一西南外宗司皆有公使錢物唯大宗正司日前多是三公使相知判各人自有歲賜公使等物不曾陳乞今不息係庶官換授若不陳請竊慮陪費不貲 一在法遥郡防禦使不該差破書表客司抱笏殿侍蓋為南班依官序差破今来不息係管宗司職事併趨赴朝參難以無人使令乞逐色各特差一名 一不息已係轉至朝奉大夫今年初遇大禮合該奏薦子孫一名乞依前宗官令詔已得指揮於文資內安排詔並從之內公使錢緣不息官係遥郡支給令戶部每歲特支錢五百貫候轉官至應給日

住

⑤ 七年英國公未就傳大理正王尚之乞選儒臣

為東宮小學教授上令討論典故正月二十六日以正
字楊暢兼皇太子宫小學教授四月十五日右領軍衛
將軍陳龜年以伴讀皇孫孝經論語終篇遷秩八年
七月十七日知宗正事不息言宗室犯罪未至拘管乞
於諸王宮學置自訟齋使之循省趙雄等奏若附太學
自訟齋規矩見成不勞措置上曰不若只令宗司自蓋
造十年五月三日詔增置小學教授一員以何澹鄭
鈞同兼十二年四月二十四日澹及羅黜兼皇孫平
賜郡王府教授十四年十二月十四日權知大宗正
事不黯言乞將西南兩外敦宗院及諸郡縣主宗室宗
女宗婦合得孤遺錢米委本路提刑常切覺察遇有積

壓不支去處嚴催督庶假監司之勢宗室獲免饑寒如
有提刑黨庇遵奉不虔亦乞施行詔令戶部檢坐見行
條法指揮申嚴約束毋致違戾 十五日詔大宗正司
武後行二人巡視親事一人衣糧親事官一人步軍司
差到看管兵士二人以司農少卿吳煥議減冗食下敕
令所裁定故有是命 十六年二月一日詔敦宗院改
為睦宗院 八月二十九日知大宗正事不黯言西南
兩外司官屬只有宗教一員係選人無舉舉改官之制
乞特降指揮許每歲發改官狀一紙舉宗教從之 紹
熙二年二月十四日大宗正司言太保安德軍節度使
充萬壽觀使嗣秀王伯圭奏本位南班宗室合與不合

主管事詔特依所乞令就行主管 六月二十二日詔
皇伯太保嗣秀王伯圭除判大宗正事 二年七月二
十七日宰執進呈禮部國子監看詳到王與乞選擇宗
屬附大學教養等事上曰祖宗別設宗學之意所以優
待宗子自是難令衆同在太學先是諸王宮大小學教
授王與言宗庠之設凡事具文有名無實欲量立數十
員之額於宗屬中擇其年少而未仕與夫有官而年未
及參選若貧而顧自奮於學者依國子生附太學例於
大學闢一齋以處之就於公厨日添錢糧養贍月書季
考之類皆可責辦學官令盡用太學規程禮部國子監
看詳今若移宮院之學於上庠又以學官業宗子規矩

即與祖宗舊法不同且如崇寧元年指揮劉俸勒住朝
參等事皆非用太學規程兼官學教授既有專職難以
更責學官兼領進呈之次故聖諭如此 崇寧慶元六

年十月七日詔西南外宗司官歲舉教授改官許逐司
每任內互舉一次以知南外宗正不戒知西外宗正公
迴言淳熙十六年八月二十九日敕節文外宗官許歲
發改官狀一紙與本司教授照得二司宗官教授皆以
三年為任初一年可發一紙至第二第三年見在教授
不可再發又別無可舉之官乞各將任內合發宗學教
授舉狀兩司只就歲發未盡之數通融互舉故有是命
嘉泰元年四月十九日詔將潛邸府改充開元宮并

崇禎三年
此年誤

大宗正司却將大宗正司改作百官辭宇 開禧七年
八月癸卯復建宗學置博士諭各一人弟子員百人
嘉定七年五月二十四日都省言本朝典故在京舊有
宗學西南兩外宗司亦各建學渡江以來西南兩外宗
司置學如舊而行在宗學尚未修復詔三省條具以聞
八月二十六日詔臨安府踏逐空閑地建宗學其學
置六齋生員以一百人為額遇補試年分申請補入隸
祭酒司業置宗學博士宗學諭各一員前廊職事四員
每齋長諭各一員其合行事令國子監長貳條具申尚
書省 八年四月五日諸王宮大小學教授危稹言竊
惟宮庠乃國家親睦教養之地伏自紹興復置以來因

陋就弊闕典甚多嘗閱按牘檢會嘉定七年二月二十五日都省劄子范擇能申請乞將本學殿堂後睦親宅空閑位子壹所量加修葺展入宮學以充講堂齋舍已劄下臨安府差官相視地段打量畫成圖本檢計工費外欲乞檢照臨安府已申事理早賜施行詔令封樁庫支撥官會三千貫付臨安府委官同官學計置如法修蓋九年十二月五日尚書省劄子勛會昨已降指揮興復宗學令隸祭酒司業今來已將諸王宮學重行建造合與改作宗學仍參照國朝典故宗學舊隸宗正寺合議施行詔將諸王宮學改作宗學仍隸宗正寺施行同詔將諸王宮學改作宗學仍照國朝典故改隸宗

正寺

文獻通考改教授為博士又置宗學諭一員並隸

宗正寺在太常博士之下諭在國子正之上俸給賞典
依國子博士及正體例於是宗室疎遠者皆得就學而
彬彬可觀矣旋有旨復存諸王宮大小學教授一員十
年正月十四日詔宗學博士班序在太常博士之下宗
學諭班序在國子正之上其請給人從賞典等並依國
子博士及國子正體例施行三月十九日宗正寺言
宗學合行事件一本學生員照得期日已迫恐妨補試
今欲且照已降指揮將應曾得解宗子附國學補試後
場引試所有合取員額候引試訖其終場人數申乞取
放施行其合格人依太學例簾試訖收供外有關額

未補之數合候後次補試申取指揮 一放待補今欲
於逐舉解發人數之外亦與量放待補每百人取一十
五人為率逐處給帖前來收試若人數不及照數取放
一外舍生太學每歲二十人校定一人今欲以一十
五人校定一人零分亦校定一人一私試太學每一十
人取一人為合格零分亦取一人今欲以八人取一人
零分同 一公試太學通榜二十人取三人內第二等
約三十五人取一人今欲以五人取一人內第二等以
二十五人取一人如有外舍校定方許隨榜擬闕陞補
以未有校定依太學追補法如追補不及格理作校定
用 一內舍生太學每一十人校定一人零亦校一人

今欲以七人校定一人餘分同上舍試年分十分為優
非上舍試年八分為優餘平等次年奏名若未有校定
不該陞補者以所得分數歲終理為校定 一上舍試
太學間歲一試每一十人取三人分優平二等約一十
二三人取一人八優等武學三歲一試每三人取一人
宗學人數不多欲以三年一放舍試亦與三人取一人
內舍須及一十人方放優等一人 一解試滿年外舍
生太學約一十三人取三人照得宗子赴監試係七人
取三人今欲以宗學滿年生依監試例七人取三人
一兩優今欲以兩八優等人許赴殿試除宗室舍得陞
甲外視科甲高下補官仍特與堂除教官差遣外有中

等下等上舍亦與依守年法赴廷試並隨科甲高下補授宗室自有陞甲陞名體例更不用攀用太學上舍恩數將來生員增多內舍及二十人以上所有兩優恩例却申取指揮 一每月私試差官今照監學訓合差宗博宗諭充考校官宗寺長貳輪充監試外有封彌謄錄官合委本寺丞簿輪充緣本寺簿時暫兼宗學諭若令封彌謄錄委有相妨今欲將封彌對讀以丞充攝外其謄錄權差本學監門使臣兼監所有逐官從例合破添給食錢本學卷子數少欲照監學官例權從半支給其使臣本學量行支破候成次序別差宗諭其丞簿却照監學例施行 一補試差官今照得太武學補試本學

除留正錄一員在外主行規矩外餘官盡行入院考校
今來本學只有博士及宗諭共二員並合入院照得初
放補試卷子必多切慮考校不辦欲就院內共考校及
封彌對讀謄錄官亦乞就差監試簾外官 一每月私
試及公試補試納到試卷照得卷子兼合用印所有木
鐫印條印乞照國子監例徑行雕造外所有試卷并封
彌謄錄印記行下所屬鑄造 一齋舍講堂合行命名
今欲權作四齋為願從本學官撰擬作立愛貴仁大雅
信厚堂名作明倫 一職事今欲通置學正學錄各一
人仍兼直學學諭各月給三千每廊齋長齋諭各一人
月給各一千照得宗學建立之始方行收補生員所有

大小職事本學即未有校定分數可差候補試開榜後
權於三名前選差屬行稍高者充長諭權兼前廊仍候
歲終校定及將來私試第一人公試三名前從本學正
行差補一吏額今欲差置職級手分楷書正錄司各一
名共以五名為額除本學見管二名元額與理年遞越
餘三名欲於他處官司且權行踏逐抽差能書寫諳知
行遣人補充仍照寺監體例訖遞遷所有各人請給欲
照宗正寺見幫勘胥史資次等第內職級依本寺正胥
史例手分依正胥佐例貼書楷書並依權貼書例正錄
司依國子監正錄司例請給支破外其職級年勞解發
恩例取自朝廷指揮送敕令所修定施行 一諸色等

人照得本學已立學舍所有官錢物書籍柴米等合差
置專知官一人於刑部差副尉充立界更替庫子一名
同共掌管攢司一名並要能書寫攢算內橫庫仍各召
保職委有行止無過犯庫子須要有家產抵當人公厨
并供學官厨子共二名飯局棹盤子一名茶酒司一名
兩廊四齋共且置正齋僕二人貼齋四人甲頭一人逐
人合支月給錢等並乞照監學請月給則例支破 一
監門監厨巡防軍兵等合欲臨安府差指揮一員先監
門兼監厨及於本府差撥將兵一十人充巡防看管半
年更替差二人充把門子 一逐月私試并以後公試
補試等今欲照監學例且招置書鋪二名遇試投納試

卷及充膳錄

一每月私試合差膳錄人今照兩學例

就差本學書鋪外仍於吏部差書鋪五名試日卷子多

寡却令本學募人 一在學生員合日破羊菜柴米等

今欲照兩學三舍生體例支破 一養士錢米今宗學

興復之初^支費未有定數生員未有校定上舍內舍欲

且五十人為額陞供依外舍生例支破及學官每月私

試考校并顧僕雜支審糧等錢內有從半支給外一年

約度共費四十五百餘貫文米二百五十餘石乞下戶

部相度於放補試日行所屬作料次逐旋支撥椿管本

學置歷收附斟酌多寡具數申宗正寺關支委本寺丞

點對送學官差庫照數支撥仍每月開具日支錢米申

寺候歲終齋亦歷候狀于照赴寺驗數照對消豁訖具
申朝廷別行支降施行 一照得已降指揮宗學仍隸
宗正寺施行所有本學應于合行事件並乞照禮部國
子監太武學體例施行並從之二十七日國子監言承
左右司牒到提轄行在權貨務都茶場趙汝俊有親子
崇肇親姪崇揆崇總并臨安府保明申到通判臨安軍
府事趙汝适有親子崇縝崇猷監行在權貨務都茶
場趙師固親子希允並乞赴本監補試照得前舉識事
釐務官牒到宗子趙國子生補試緣未立宗學本監已
行收試了當今有宗學見行開補所有宗子月書季考
等並照太武學體例施行亦合有在朝職事釐務官牒

試宗子國子補試項目緣昨來宗學失於申明上件項
目是致逐官牒到宗子赴國子補試本監難以收試申
取指揮施行宗正寺看詳補試宗子照得在朝職事釐
務官如係宗室自合牒宗學收補詔送宗正寺照應收
試施行 二十八日宗學博士危稹言本學元係諸王
宮大小學已降指揮改為宗學其生員見行補入所有
昨來諸王宮學承大宗正司訓遣到聽讀生員內未曾
請解人委曾在學聽讀係轉入大小功課薄生員通約
不過一二十人亦當念其向學之心欲與許赴今來補
試從之 四月二十日宗學補試所言宗學學生補試檢
照已降指揮應舉取應曾得解并在朝職事釐務官牒

試宗子附國子試後場引試所有合取員額候引試訖具約場人數申取指揮施行今來已引試經義詩賦一場據封彌所申終場人數共五百二卷乞指揮取放人數詔通放三十名二十四日宗學博士危稹言昨備申終場人數去後恭被省劄通放三十人以終場五百二人論之其數誠為稀少難為取放稍多特宗子解試例是七人取三人省試則七人取一人其選取之路本寬今國家加恩皇族又置宗庠使由舍選以入可謂隆厚而制必稍優以示勸厲不敢比類解省試陳乞止乞十人取一人增放五十人庶幾上副朝廷建立宗學之初意詔更增一十名以四十名取放二十八日宗正

寺言宗學博士危稹主簿兼宗學諭錢撫劄子本學自
補試放榜二日後即行簾引於四月三十日 陞供

可預霑季者止有一十三人五日後雖間有參學人即
不在霑季之數今來合引私試方議區處告假求去者
日有其人和所以然皆云人數既少又多孤經月試限
以八人取一人則一日終可取二人外舍限以十五人
校定一人則一歲纔可校一人其選既艱無以為銖積
寸累之地竊覩朝廷所以興復宗學之意本以加恩皇
族宜有優異以示激勸緣宗子進取之塗素寬難以太
學舍法律之况太學雖約一千四百人為額而住學者
多止三百餘人其外舍校定約七十人則是名曰二十

人校一人實則四人以校一人故本學向來條具乞用武學舍法每月私試與每歲外舍校定皆欲以一十人取三人比之太學雖若稍優然宗子皆是實在學者太學以實在學者四人以上校一人本學以實在學者三人以上校一人其所增初不為多若依今來所乞以見需年人計之歲終外舍校定亦不過四人而已乞照武學舍法取放私試及校定人數俯念立學之初宗子在學數少特與照武學例放行俟將來補滿一百人元額却行別議規制一本學補試卽次承降指揮取放四十人今來已有生員共一十三名簾試參學了當內一右為患出假外見供一十二名私試承已降指揮八人

取一人零分同今生員止有一十二名若照上項分數
只合取二名無以示立學勸勉之意照得武學私試十
人取三人今來若照武學例取放亦止該取四名本學
校定承已降指揮一十五人校一人見今往學生員共
一十三人若照上項校定人數尚未該校定一人照得
武學外舍生例十人校定三人零分亦校一人今來若
照武學例併算零分亦止該校四人更合取自指揮本
寺照得宗學建立之初參學生員尚少若不權從所申
則無以示勸誘之意詔權依宗正寺所申候將來取放
生員及額日却依元降指揮施行 十一年二月二十
日宗正寺言宗學申本學公試已降指揮照武學例附

太學公試場引試所有試院合支公使支供等錢并雜
物油酒等今比擬下項 一公使喫食等錢今欲比附
武學公試合支則例 一宗正寺長貳入院陞補并將
帶人吏今欲比附國子監長貳入院陞補并將帶人吏
則例 一院內主行文字人吏二名食錢犒設等并就
差諸色祇應人合得引試犒設今欲比附國子監手分
貼司并武學引試祇應等人合得則例 一應干合用
紙札朱紫柴炭油酒雜物之類並乞從諸司官比擬條
具數目支撥施行從之 十二年五月十九日宗正寺
言宗學職級年勞解發恩例照得國子監人例年滿格
法係補職級及五年通入仕及三年解發赴吏部補官

今來宗學與國子監事體一同所有人吏年勞試補比
換等事乞依國子監見行格法體例施行從之 京官
司欲照六曹寺監一體施行從之 十二年八月三日

臣僚言大宗正司專糾合宗盟之職所宜望實素著乃
能觀聽具孚今以嗣秀王兼總深為允當乞今後除授
知宗湏擇老成更練之人庶幾肅示表儀同歸信厚尤
稱陛下彊宗之意從之詳見宗室雜錄 十四年三月
八日類試宗學公試所言宗學興復之初補中生員四
十人公試取放每十人取放四人嘉定十一年公試終
場三十二人申明朝廷令第二等取一人第三等取放
二人餘九人並作四等嘉定十二年公試終場二十六

人再行申明於第二等第三等內各增放一名十三年
公試十六人亦依十二年例取放今來公試五十二人
所乞第二等第三等各行增添取放兼照諸經多寡不
齊通融混取詔宗學公試與於第二第三等內更添放
一名餘並作第四等取放仍將諸經通融混取 四月
一日從事即行宗學諭范楷劄子奏臣備數宗庠職在
訓諭茲遇陛下加惠同姓增廣黌宇經始不日幸已落
成橋門顯敞堂廡深邃規模鼎新群目增煥甚盛舉也
然學館雖盛而教養之事猶未盡備臣不吝不冒昧言
之臣聞五學之建上親為首同姓之蕃近屬尤親國家
始立宮學所以訓諸王之近屬繼創宗庠所以徠四方

之宗親因其初意而增崇之非固欲使新聞舊疏踰戚也
今睦親之宅廣為學宮教授之官轉為博論曩之宮學
一變而為宗庠矣由試而入者則預教養而前日近屬之
親嘗列為第千員者反不獲周旋於其中一遇講說僅
得旅進退於館下寄一食於公庖而已雖勤敏嗜學者
思欲登名於籍有不可得甚非國家親親之始意也
又况學校之廣十倍於前而養士尚仍其舊區宇宏大
弦誦寂寥亦非所以崇教化肅觀瞻也曩者中興初建
太學每歲二補其後歲一補又其後始三歲一補著為
定式蓋創建才新招徠貴廣理所當然今必拘三歲而
一試復限以已請舉之人員額不寬來者宜少夫親者

既不獲與疏者又未盡來雖儒館之新恐直為觀美耳
欲望聖慈俾前隸宮學諸生並特許附公私試其公私
試皆中選者即與正補宗學生凡隸宗盟者仍於今歲
特與放補一次不以請舉為限因復諸王宮大小學教
授一員以廣訓迪俾諸王近屬之子孫年十五以下者
亦許試小學生如是則遠近宗屬皆相免以興於學以
厚人倫以睦同姓顧不韙歟臣不勝拳拳後批送部勘
當申尚書省本部連送國子監勘當今據本監申送衆
官聚議今據宣教郎國子博士許應龍等狀申令聚議
開具申禮部備申都省取自朝廷指揮施行 一范宗
諭奏劄乞將前隸宮學諸生並特與附公私試及諸王

宮子孫年十五歲以下者亦許試小學生仍復諸王宮大小學教授一員今衆議照得宮學舊有教授所以訓諸王之近屬今宮學改為宗祥教授轉為博諭四方之宗親由試而入者皆預教養而近屬反不獲預申請委實尤當今欲乞復置教授一員以廣訓迪仍令舊籍宮學諸生並特附公私試如兩試皆中與補宗學生員十五歲以下亦許試小學生庶幾親疎宗屬長幼子孫皆被作成之賜一奏劄內又乞特放宗學補試事今衆議證得宗學昨未只與已發舉人就補所以未試者寡雖兩次取放僅得九十名自今在學不滿三十人今來學舍增創十倍於前合廣招徠之路欲從所陳證太學

初建體例特與放補一次不以已請舉為限於今秋附
試場排日引試仍乞先期行下諸路州軍曉示施行本
監所據衆官聚議申到事理備錄在前今勘當欲從衆
官聚議申到事備申都省取自朝廷指揮施行詔從禮
部勘當到事理施行劄付宗學 七月十四日宗學言
大學體例有醫官二名以為坐齋諸生緩急療治之備
今來宗學規模增廣生員衆多雖叔太醫免解生即良
臣一名未曾申明請給是致本人未專奉職今照得太
學有醫官二名分番宿直每名除本監月支審糧錢五
貫文外有合藥等錢係屬左藏庫幫支昨叔太醫解免
生即良臣每月亦於本學支給審糧錢五貫文所有合

藥錢乞下所屬幫收從之 八月十三日都省言仍復
諸王宮大小學教授一員照得樞密院編修官正除特
與命詞給告今來諸王宮大小學教授亦合一體施行
詔今後正除諸王宮大小學教授特與命詞給告 十
六年十一月十九日都省勘會行在大宗正司近朝廷
料降錢物鼎新修蓋已一切圓備合議指揮詔令如宗
宗丞自今後照百司例每日入局不許在內居止亦不
許轉借與人充解 十七年正月二十七日詔將宗學
上舍與注教官差遣仍在太學曾陞補內舍人之次注
書先是臣僚言國家中興文風尤盛故雖麟趾之公子
亦皆疊疊學問博古通今英材輩出陛下首建宗學置

儒師之官嚴書考之法甚盛舉也故近者宗子繇宗學而出官者援舍選之例得為教官誠是也而宗子之在殿試科甲而為教官者亦絕無而僅有臣謂天族責責非寒素之士師資之間誠意不接則責善之道或致相夷故宗子之在舍選者宜證殿試前名優與差遣其州郡教官並不得差宗室既而都省送國子監者詳國子博士胡剛中等聚議宗室殿試第一甲人許注教授係自乾道年著令分明宗學生由舍選而注教官則始自近年復建宗學之後比因臣僚奏請今宗子在舍選者宜證殿試前名優與差遣不許注授教官都省批謂殿試第二至第五人及太學兩優釋褐人並補文林郎從

事卽注職官自第六名以下除教官外止注判司簿尉
若別議優與差遣竊慮階官資序有礙銓法竊詳都省
所批見得事理分明臣僚優異之說若與注職官委礙
銓法若不許授教官止令退而注判司簿尉則非惟無
以稱優異之說而殿試甲科宗學舍選却怨遂成虛文
故有是命 六月三日臣僚言臣聞上之開設學校貴
乎教養之兩盡下之講明學問貴乎師生之相資師生
日親則教養無愧矣臣讀學記曰凡學之道嚴師為難
師嚴然後道尊道尊然後士知敬其學三代之學所以
淑人心粹化原者亦惟範模之功是賴仰惟國家設成
均以風四方創建宗學為我宋億萬斯年之計倚歟休

哉士生斯時魚躍鳶飛抑何幸邪謂宜涵養作成光明
偉偉追棧樸官人之盛衍豐水數世之仁超邁前古可
也而臣拳拳愚忠有願為陛下告者臣起自諸生粗識
學校事體有司成以總其綱列官師以任其職月有私
試必公心去取使營求者不得以行其私旬有堂課必
詳與批抹而俾齋者亦足以示其勸點請生員以扣擊
其所得反復問難以攷驗其所蘊朝夕接密而師生舉
無隱情聞見既廣則器識自充異日致君澤民之業實
基於此今乃不然臣不欲悉數其故長貳有兼識間不
入局則學官足綆及直舍而旋即命駕矣不聞延見佳
士尚何考德問業之可望還舍既不許接見生員自應

質疑辯惑之無因規矩昭揭固非所以繩善類也不肅
則踰者無所忌憚出假者節蓋欲其一意肄業也不檢
者乃肆行而自貽伊感試有得失各安其分可也彼黜
者乃誣謗喧傳至於下有司究問此何等士風而見於
有道之世耶負陛下教養之恩多矣今之宗室非不備
餼廩非不豐識治者謂有養而無教是誠可咎耳昔韓
愈晨入太學招諸生而誨之視此寧無愧乎臣受恩思
報有見輒言事有關於風化之大者尤當不避仇怨欲
望聖慈下臣此章以示三學使知以天子學校為念以
諸生講明學問為急勿徇私情一洗舊習丕變士風不
勝斯文之幸詔從之

宋會要 太學

六月以右諫議大夫崔頌判監事始聚生徒講學帝詔中使以酒菓賜之
開寶八年國子監上言生徒舊數七十人先奉詔令分習五經內有繫
籍而不至者又有住京進士諸科常赴講席緣監生元有定數欲以在監
習業之人補充生徒詔令元繫籍而聽習不闕得千秋賦繫籍而不至者
聽於本貫請其未入於籍而聽習者或有冠裳之族不居鄉里令補監生
之闕宋初增修國子監學舍同額德二年以天福寺利輝院建國子監修
飾先聖十哲像畫七十二賢及先儒二十一人像於東西廊之板壁
大中祥符二年四月國子祭酒邢昺言欲望自令補蔭出身人將來差遣
並須先於國學聽書二年候滿日本學牒送審官院依條試驗方與差遣
詔國子監如內有年及二十五以上願就差遣者試習經書或有講學據
其所業考試聞奏

慶歷二年閏九月天章閣侍講史館檢討王洙言庠序之設教化所先自
頃學徒未懋師業國子監每科場詔下許品官子弟投保官家狀量試藝
業給牒充廣文太學律學三館學生多或至千餘人即隨秋試召保取解
及科場罷日則生徒散歸講官倚席若此但為游士寄應之所殊無國子

肄習之法居常講筵無一二十人聽讀者以聖朝經籍道崇儒雅日盛豈
茲學校弗著彝規必若稽於唐漢率之令典則慮改作為重尚難玉革誠
能少加程約亦將有所招來况之前日漸可馴致欲望自今應國子監每
遇科場敕下授納取解家狀日已前須實曾附本監聽學滿五百日者許
投狀令本授業學官取文簿勘會詣實依例召京朝官委保方得取應每
十人之中與解三人其未係監生欲求試補者亦不限時月每有一二十
人投狀即逐旋量試藝業收補只令在監聽學簿管姓名仍每日講筵應
係聽讀生徒並於本監授業學官前親書到歷如遇私故出入或疾告歸
寧並於判監官處具狀乞假候迴日於名簿開記請假日數若滿一周年
已上不來參假者除落名籍大率數年一過科場若聽學五百日者許取
文解在其間游息之日多矣然於學校之版齒位之叙必衆於今日也願
下學官參議施行詔國子監詳定以聞本監請自今去經試補學生並依
起請聽讀滿五百日方許取解已得國學文解省試下者止聽讀一百日
許再請解並十人與解三人所有逐日聽讀親書到歷如有請假託人代
書其不到及代書人實殿三舉仍落名籍學官故縱者科違制之罪律學
即日一仍舊制釋奠先聖學官師生員陪位近歲多不遵行自今每遇釋

三年十一月
一日詔國子
監太學生
下州縣學生
往更不主
讀書限近
制興學校
送儒士充
教授咸有
課試之法而
諫官余請

莫見在監聽讀生員並須陪位學徒羣居宜較文藝以激進修自今後每
月兩次輪差學官兩員出題目量加考試第其優劣唐置六學皆品官子
弟充員其庶人子弟亦有四門學今國學除七品已上子孫許召保官試
補外八品以下至庶人子孫例不收補自來雖有此條實每遇科場多有
冒稱品官子孫難以詳別致容假冒或興訟訴自今欲依做唐制立四門
學以八品以下至庶人子孫補充學生不唯漸革偷薄亦以示國家育材
之廣也附監生徒聽讀已久須正係生員名籍自今每歲一補試差學官
鎖宿對彌精加考校取文理相通者具名聞奏給牒收補內不合格者且
令理日依舊聽讀後次與試若三試不中者便不在試補之限從之
五年正月十二日有司上言錫慶院不可廢詔三司別擇地乃以馬軍都

虞候公宇為太學

熙寧元年正月諫官滕中劉庠並言慶厯中太學內舍生二百員並官給
日食近年每人只月支錢三百文添廚其餘自備比舊所費殊寡即今補
試諸生一百五十人方撥四五十人入學足二百員數餘試中未入學者
尚百餘人遠方孤寒待次多日却歸鄉里奔馳道路今太學齋舍空閑甚
多欲乞增置生員一百人作三百數況本監歲收租課足以供贍又諫官

極文其非
便故有是命

加五年二月條

皇祐三年七

月四日詔太學

設官多以教

導為職以

歲增以房宇

賜之士田計

置內舍生二

石名如園未終

先對令宜以

百人為限

加數寧元年條

上

吳申言今太學生徒以二百人為限其數畝狹遠方之士逾年待次伏乞
學生不限員數庶使嚮儒日盛流化天下詔申庠再參定申等言欲於內
舍生二百人外增一百員名外舍生逐旋補試且令入齋聽讀仍不給官
中貼厨錢候內舍生有闕即將外舍生撥填如此則有廣朝廷育材之意
亦不違先降學制從之 山堂考索五月章臣準詔讀學校貢舉多欲變
改舊法獨殿中丞直史館判官誥院蘇軾奏曰得人之道在於知人知人
之法在於責實使君相有知人之才朝廷無責實之政則公卿侍從常虞
無人況學校貢舉乎雖復古之制臣以為不足矣臣願陛下明敕有司試
之以法言取之以實學通經術者雖樸下廢黜涉浮誕者雖工必黜則風
俗稍厚學術迨正庶幾忠實之士不至蹈衰季之風則天下幸甚上得軾
議喜曰吾固疑此得軾議釋然矣知制誥宋敏求因轉對上言州縣有學
舍而無學官四方之士輕去鄉里者以求師也請州置學官三歲一下務
得士三百人今請置百人試詩賦論策糊名通考之如舊其百人請如敕
文令則郡論薦轉運使審覈之太學生則委判國子監官御試隨其所學
而試之學有師故士不輕去鄉里隨其所學而試之則文辭經藝行實之
人皆無遺也其後官不數變易太學建三舍命舉人以官州置學官三

取百人多敏求發之也 玉海舊制試補監生六百人五月增為九百人

四年十月十七日中書門下言近制增廣大學益置生員除主判官外直講以十員為額每二員共講一經委中書選差或主判官奏舉以三年為任選人到監五年與轉京官或教導有方職事不修者並委主判官聞奏當議陞黜其生員分三等以初入學生員為外舍不限員自外舍升內舍內舍升上舍以百員內舍以二百員為限其生員各治一經從所講之官講授主判官直講逐月考試到優等舉業並申納中書學正學錄學諭仍於上舍內逐經選二員充如學行卓然尤異者委主判及直講保明聞奏中書考察取旨除官其有職事者授官訖仍舊管勾候直講教授有闕次第選充其主判直講職事生員並等第增添支食錢從之 二十八日詔殿中丞宋靖國贊善大夫呂嘉問相度錫慶院建太學從御史知雜鄧綰所請也綰言國子監粗容春秋釋奠齋庖之室不足以容諸生至於太學即未嘗營建止是假錫慶院西北隅廊屋數十間逼窄湫隘又官司未嘗葺治今大新學制學者聞風坐然畢集恐不足以容乞特賜錫慶院為太學故命相其地建之 文獻通考生員纔三百人請以錫慶院為太學仍修武成王廟為右學上以擬三皇四代膠庠序學東西左右之制下則可

復於漢唐生員學舍之盛乃詔盡以錫慶院及朝集院西廡建講書堂四
諸生齋舍官掌事者真廬器具而太學棟宇始謹足用議學校貢舉初
蘇頌子嘉在太學願復舊策問王莽後周變法事嘉極論為非在優等蘇
液密寫以示曾布曰此輩唱和非毀時政布大怒責張琥曰君為鍊官判
監豈容學官與生徒非毀時政而不彈劾遂以告安石安石大怒遂逐諸
學官以李定常秩間判監選用學官非執政所喜者不與陸佃蔡宗孟葉
濤曾肇沈季良與選季良妻石妹婿濤其姪婿佃門人肇布弟也佃等夜
在安石齋授口義旦至學講之無一語出已其沒三舍皆欲引州其黨耳

全唐文

宋會要

太學

紹興十二年十一月十二日詔太學養士權於臨安府措置增展其格法令禮部討論先是屢有臣僚言宜復太學以養育人材上以戎事未暇至是乃有是命十二月十二日詔太學養士權以三百人為額禮部討論國子監養士國初取補國子三百人為額慶曆三年仍立四門學以士庶子弟為生員嘉祐三年以四百五十人為額七年增一百五十人慶曆五年為太學皇祐三年許置內舍二百人熙寧元年以四方士人盛集京師遂以九百人為額四年以一百員為上舍至元豐以來養

士以二千六百人為額上舍一百人內舍三百人外舍
二千人國子二百人昨來行在監學以元隨從車駕
三十六人為學生故有是命同日又詔行在監學置祭
酒司業各一員太學博士三員正錄各一員十三年正
月癸卯以岳飛第為國子監太學前洋街堂一曰崇化
淳熙十六年二月改今名齋十有二後身至時中高
閣擬齋名在二月乙酉舊太學七十七齋二月已

卯國子司業高閌言陛下復興太學凡養士取士之法
當取聖裁上曰自有祖宗成法閌曰有慶歷元豐紹聖
崇寧法有司未知適從若出於聖裁則行之乃久閌又
奏舊太學辟雍皆有御書亦乞建閣以藏御書仍願

特灑宸翰加惠多士時詔太學額外補中之人許令待
闕候見闕日與參长假人對撥至科場年許赴監依不
滿年人例取應二月二十二日詔補太學生以諸路住
本貫學滿一年三試中選不曾犯第三等以上罰游學
者同或雖不住學而曾經發解委有士行之人教授委
保申州給公據赴國子監補試其令秋四方士人來就
補試恐有已到行朝或見在路其間有不曾住本貫學
之人難以阻回權將執到本貫公據人許補一次從國
子司業高閌請也同日國子司業高閌言今參合條具
太學課試及科場事件如後第一場元豐法紹興元祐
大觀同本經義三道論語孟子義各一道今太學之法

正以經義為主欲依舊第二場元豐法賦一首今欲以詩賦第三場紹聖法論一首策一道今欲以子史論一首并時務策一道為三場如公試法詔從之同日國子司業高閌言契勘太學補試依元豐法合試經義一場宣和法同今為士人多習詩賦解通經義難以純用經義收補其舊習經義士人或不習詩賦又難以純試詩賦竊見仁宗皇帝朝判國子監胡瑗所補監生只試論一首今欲補欲權依此例且試論一道係是經義士人素所安習庶幾均一自紹興十四年秦補並依元豐法伏望睿斷以幸學者自今日始永為定式詔從之二十七日國子司業高閌言在京太學講堂及諸齋名並係

神宗皇帝所賜今來崇復國學已興修一堂欲以敦化
并在京太學齋名七十有七今來已興修一十二齋欲
擬褫身服膺守約習是允蹈存心持志養正誠意率履
循理時中從之三月三日國子司業高閌言臣聞先王
謹庠序之教必先申以孝悌之義國學舊法或犯不孝
不悌固不在入學之限而在學九年不歸省侍者則斥
而出之 徽宗皇帝慨念九年之遠非所以敦其養親
之心特降御筆立為三年之限匿而不陳仍重其今其
法藏於有司今尚存也自罷舍法之後專用舊制而此
法遂不復行今國學落成有日駿惠前烈以章孝治此
其時也願詔有司復立三年之限從之 四月五日詔

大學補試及私試並用謄錄役左迪功郎張保大請也
六月十二日知臨安府王喚言根括到本府城外居民
冒占白地錢月得二千八百餘貫欲充太學養士之
費若以三百人為額除假故外可以足用從之 十九
日宰職進呈差太學官文字上曰初復太學師儒之位
尤當遴選須得心術正者為之講明經旨開諭後進一
有邪說學者從而化之為害非細卿等切宜重擇 二
十一日詔差禮部侍郎兼權直學士院王嘗撰興建太
學記知臨安府王喚有請撰記下國子監勘會國朝太
祖皇帝重建國學係翰林學士十陶穀撰記徽宗皇帝御
製辟雍記係翰林學士薛昂撰序及重修監學翰林馮

熙載撰記故有是命 太學課試法詩國子司業高闕言
最先經術上曰經不易通士習學賦賦已久遽能使之
通經乎闕曰先王設太學之意惟講經術而已上曰近
侍讀官程瑀亦論經術闕曰國初循唐制用詩賦神
宗始以經術造士遂罷詩賦又慮不足以盡人材乃設
詞學一科試以雜文上曰詩賦亦雜文也闕曰取士以
經義為主不過三場後加詩賦為四場不能無礙蓋太
學之法旬有課月一周之日有試季一周之若加一場
則課試之法遂紊自元祐以來雖增為四場終不可行
者蓋以此也今欲經義第一詩賦第二論策各一第三
上可之庾辰闕具分三場乞永為定式時闕又請在學

人定三年歸省之詔詔可上曰舊有九年之法徽廟方
改作三年豈有士人九年而不省其親者乎 七月壬
申時國學新成補試生員四方來者甚衆幾六千人丙
子揭榜取徐驤等三百人 九月戊辰知建昌軍李長
民言軍興以來學政中輟令和議既成儒風復振郡邑
長貳宜兼學事以示優武修文之意詔從之 十月乙
丑侍御史季文會論新除國子監丞石安慶輕儇無行
丁酉上曰太學風化之本使此人充監官何以取重於
士人詔即罷之 十一月戊午時上所寫六經與論語
孟子之書皆畢檜請刊石于國子監仍頒墨本賜路州
學詔可 十二月辛卯新知永州熊彥詩上言欲依嘉

祐治平故事補中監學生命補給綾紙命祠詔從之
十二月十七日詔太學養士添二百人令國子監措置
增展齋舍先是權以三百人為額至是刪定官制及有
請從之 癸巳上謂宰執曰學校者人材所自出人才
須素養太宗置三館養天下之士至仁廟人才輩出為
用秦檜曰國朝崇儒重道變故以來士人雖陷虜者往
往能守節乃教育之效也上曰然五代之季學校不脩
故無名節今日若不興學校將來安得人才可用耶

宋會要

太學

三十一年五月二日詔太學國子正錄兼講以臣僚請置六經博士故有是命 六月詔太學博士正錄各減一員 三十二年孝宗即位未改元十一月二日詔館職學官祖宗設此儲養人材亦欲待方來之秀不可定員以殿中侍御史張震言臣前日嘗奏陳復置正錄以待宰執所薦之人是將復開冗官之源且立法不信無以示天下蒙陛下開納以謂其源不可不塞聖意固已定矣今已數日而未施行所除高適亦不復改命則是必有以為不然者冗官之減不減不過一正錄而已未為大費而臣之所惜者朝廷命令朝行夕改無以取信於天下且當時國子監所減者正錄二員太學博士一員書庫官一員武學諭一員今日正錄復置則持是說以求進者源源而來上之人既無以制之則將盡為之復此員闕而後已出令如此其何以示天下乎臣願陛下無輕為一士而變已行之法使人皆知上有所必守則亦不敢徵求於法之外矣故有是命餘依奏

宋會要學

隆興元年二月二十三日禮部言伏見已降指揮應省試年分於二三日
間許行開補今歲未合補試緣赴省試下第之人已皆留此待試有旨令
禮部取見有無關額中尚書省特與開補一次本部續下國子監勸會太
學外舍生一千人為額自今額足即無見缺欲乞將在學免解在假一百
餘人開補一次候逐人參假日有關依次撥填施行從之 六月二十九
日詔罷太學補試每遇有試年分本學刷具見闕人數以諸州解發舉人
赴省試下者隨缺額多少撥人如闕多則以逐州解額十分為半撥二分
闕少則以逐州解額十分為半撥一分之類臨時斟酌並從逐州解榜上
名撥入上名已過省更不撥下名其合撥人不領入學者聽不許以次人
充填其合陞撥之人並赴簾前試訖注籍為太學生先是禮部侍郎黃中
等言者詳到百官應詔封事言太學就補試者每次不下數千人多不四
本貫保明給據故其間或有隱憂匿服不孝不悌得罪於鄉黨閭里之人
有司無由知之使其中選為太學生豈不有玷士類欲望行下州縣補試
之法其補中本貫州學從上撥入正額給食者往學一年堂試三次合格
不犯第三等已上罰教官保明中州給據方許赴太學補試又士庶封事

言宜罷太學春試而以州郡應舉終場人數裁為定額令州學每歲月書
季考取其秀者若干人而貢之於太學都省送部下國子監看詳本監契
勘太學補試雖有紹興三十一年指揮今今未臣條條具弊事令赴試之
人須管住本貢州學一年私試三入等不犯第三等以上罰委教授保明
申州本州保明給據前來赴試其州郡往往函莽多不照應原降指揮次
第保明止是隨壯給據泛稱於貢舉條例並無違碍如此之類十有四五
本監臨時難以却回再行保明不免申取朝廷指揮先次收試然後勘會
其間或有隱憂匿服曾犯刑責得罪於鄉黨閭里者無從稽考又就試萬
餘人恃眾喧呼至有不請據不納卷不引保平白入場稱云失試卷一面
就薦前請准備試表或就前後兩場赴試之人不遵士檢亦無忌憚理宜
更革故有是命皆本監請也又獻通考始三歲一補太學選舉恩無免解
法帝始創行之目是為例省額增數十人

乾道元年三月七日詔太學

依舊補試更不廢入省試下人禮部言契勘太學收補外舍舊法並係補
試取文理通者為合格緣隆興元年六月內一時指揮依士庶封事罷太
學補試以諸州解發舉人赴省試下者隨缺額多少撥入是致陳興宗等
陳乞依舊法補試國子監指定若永罷補試止撥省試下進士即四方未

曾得解士人更無可以入學之望難以杜絕士人詞訟欲乞達隆興元年三月七日指揮候省試了單日開補仍乞以本學在籍過省人數為額取放主為定制故有是命 二年二月八日詔復置太學正武學諭各一員

二月時詔下省併曾請舉赴補人以太學過省關額收補額外勿曾在朝清要官眷親許牒子弟作侍補國子別號考校如太學生遇有期親任清要官更有國子生不預校定外補及差職事惟得赴公試私試科舉則混試焉 舊公私試皆學官主之自淳熙後公試仍鎖院降敕差官學官不預 太學補弟子員政例每三歲科舉後朝廷差官鎖院凡四方舉人皆得就試取合格者補入之謂之混補淳熙後朝廷以就試者多欲為之限制乃立待補之法諸路漕司及州軍皆以解試終場人數為準每百人而取六人許赴補試率以開院後十日揭榜然遠方士人多不就試則為他人取其公據代之冒濫滋甚慶元中遂罷之嘉泰二年復行混補就試者至三萬七千餘人分六場十八日引試云 三年黃倫以兩優擇褐自銘興建學至是始有兩優用崇寧恩例授承務郎國子錄 朝野雜記舊制太學上舍生積校已優而舍試又入優等者就化原堂擇褐就擇褐此元例補承事郎太學正錄淳熙初鄭鑑自明由此退不四年而為著作郎

補郎自明數言事上甚善久而積厭之六年劉純更克夫復以解福陰國
子正時王仲行為兵部尚書奏言今兩優擇福初授京秩即授學官視狀
元制科恩數過之事理不當乞先與外任時知滁州張商卿亦言今中上
舍為學官不數年便可作監司郡守擬訟財賦非所素習宜能保其不誤
乞先注職官上與之十月丙申詔與殿試第二人恩例 四年正月十一
日詔太學生黃倫升補上等上舍特與補左承務郎除太學錄國子監書
興復太學已來未有行過上等上舍事例至是特有是命九年十一月二
十四日鄭鑑亦知之 十二月二十一日詔復置太學錄一員以教賜同
進士出身親校之為左迪功郎填闕仍令有司給賜袍笏 五年五月十
四日詔太學補試七人取放一名零數更取一名以國子監公補試所言
太學補試已行引試終場內除國子生已有取放人數明文所有太學生
終場共五百五十八人據太學具到今年已授官出學人闕額一百三十
三人照得在法太學補試以省試年分許行補試仍將太學過省闕額補
填取放即不得額外別立增添名數今來本所即未敢擅便據闕取放合
取自朝廷指揮故有是命 六年六月二十三日詔太學生員見有闕額
時與放行今來秋補一次仍不得以得解人為限並依乾道二年以前指

揮體例施行其武學增作一百人為額今後太學闕二百人武學闕三十人取旨試補 七年正月九日禮部國子監言勘會紹興十三年十二月十一日已降指揮補試中選學生下所屬給降素白綾紙付監依做祖宗制度贊詞書填給付照得自復興太學補中學生出給綾紙其贊詞有復興太學四字今來已是興復日久所有詞語欲乞朝廷教奏許令本監重別撰贊詞書填給付施行從之 九年三月二日起居郎留正言太學時文四方視以為法而士風厚薄人材盛衰皆可概見於此國家取士三場各有體制故中選者謂之合格數年以來有司去取以意士人志於得而已程文多不中度故議論膚淺而以怪語相高對策全無記問而以浮辭求勝大抵策尤卑弱每刊行公私等試文字不足以傳示四方臣恐天下士子以謂朝廷好尚如此隨風而從不讀史書見聞淺陋人材風俗所繫實重今次太學見引公試望詔主司精加考校詩賦取合律經義求得體論策以記問該博議論淵源者真之上游庶幾傳布四方士子知所適從於時政亦有所補從之 九月二十一日國子監上舍試所狀勘會太學上舍試取人依條通取不得過三分人材不足則闕之今來乾道九年太學上舍試就試終場六十六人依條每十人取三人共取一十九人外有

二人六分有零俸少六分有零取不及二十人本司未敢便行將零分取
放一名詔零分許取一名 淳熙元年七月二十六日詔太學置射國先
是知道州樓源言乞依舊法許太學諸生過旬假日過武學習射禮部國
子監看詳太學生員數多欲早晚習射以武學射國狹兼太學生過武學
與告假人混雜乞就太學自置射圃從之 八月十二日國子司業戴幾
先言乞將太學私試習經義文理優長數外取放詔令禮部勘當以開既
而禮部言太學格每月私試取人以十分為率取不得過一分至歲終
外合校定依條每十人取一人係將每月私試合格積累分数從上依分
數名次校定今未幾先乞將二禮春秋文理優長之人優加取放即與歲
終校定人數並無增加止緣三經逐月就試人數每經不過數人若不稍
加優異竊恐習者愈少漸致廢絕今指定欲將二禮春秋於考校日如有
文理優長於合取分數量行取放如無優長止依元法從之 二年二月
八日詔太學詹士錢令臨安府於係省錢內每月貼支三百貫應副吏遣
以司業薛元鼎言緣節次補試增展員額復興武學目今遺乏故有是命
又四年十一月二十九日司業王達言目今有赴赴省試公試住學生員
行食人數眾多支用不足詔每遇省試年分令臨安府於係省錢內每月

貼支六百四十貫應到一季 六月四日詔太學補試今次士人倍多將

考銓試官於所降敕後並帶兼考太學補試經義詩賦仍添書

月八日詔國子監試官等各親減鄉人赴補將卷別作一行排定生次

應薦內試官並不得干預薦外職事如違令本院長官覺察以聞其今次

太學補試應考試官本宗親戚試中之人並未得參學候將來有國子試

日重行收試 於是祭酒蕭之敏自劾放罪九月十九日禮部侍郎趙鼎

言近日太學補試進士多至萬六千人場屋殆不能容理宜裁節今欲依

敕紹興三十一年舊令諸州教官歲取本州士人任學最久試中最多者

從上保明仍別立定額本州解額一名處聽保明五人赴補試解額十名

處聽保明五十人至一百人止州學保明申州州中監監申禮部過教者

教官守貳生之人数不足者聽闕其有馳驚他州要求保明者依貢舉官

鄉貢條法科罪從之 十二月十七日太上皇帝慶壽赦應紹熙三十二

年以前補中太學國子生見年七十以上人可令禮部保明以聞特與補

迪功郎四舍上舍生父母年七十以上外舍生父母年八十以上並與初

品官婦人與封號已經官封者父與轉一官資母與冠帔令經兩屬自陳

保奏 三年四月三日禮部國子監言大小職事該遇慶壽赦奉酌推恩

人內舍生永免文解紹興三十二年以前陞補已有陞甲陞等占射差遣
恩例人二名候將來到部日與備一資賀表首名內舍生有平等校定人
一名與永免文解內舍生永免文解有平等校定人一名候將來過省殿
試唱名日與陞甲上舍生永免省合該陞甲人七名候將來殿試到部日與
占射差遣一次內舍生永免文解并上舍試中平等人一名候將來過省
殿試唱名日與陞甲外舍生永免文解人一名候將來過省殿試唱名日
與陞甲上舍生永免將來合該陞甲人三名候將來過省殿試唱名到部
日與占射差遣一次內舍生永免文解有平等校定人二名候將來過省
殿試唱名日與陞甲內舍生永免文解人三名候將來過省殿試唱名日
與陞甲內舍生有平等校定人二名與永免文解人四名候將來過省殿
試唱名日與陞甲不係免解人二十四名與免文解一次學生並賜來帛
詔並依擬定內書東禮汪南金並特與免省更不循資滿賀已積官更不
與免解恩例書東禮汪南金並舉人李傑潘賢傑外舍生年七十八十一
月十二日南郊教國學進士先請後免或先免後請可並與免將來文解
一次六年教同四年二月七日詔兩學教甚可與修葺今南庫支二萬
緡委知臨安府趙璠老修葺其規模狹陋去處令隨宜展拓務要如法毋

致減裂

二月十一日詔太學文宣王像并從祀一十二位令重行塑繪

所有舊像遷於首善閣下五月十五日詔太學選差職事依條長貳

學官以三舍生次第選補即才行為衆所知聽不次選既而國子監言淳

熙二年四月三日已降指揮將三舍生合差職事人銓次科別立定差格

前廊職事先差中等上舍上等釋褐出官次差下等上舍次差內舍優等

校定人次差內舍平等校定人諸齋長諭先差上舍內舍次差公試解試

謂本監解第一人次差外舍校定第一人次差補試私試第一人次差公

試解試外舍校定補試私試上三名入各須有行藝均以陞補及中榜先

後高下為序應格多者為上內有曾經犯罰人各在本等之下本監竊詳

近降指揮選差大小職事既稱各須有行藝即不專用資格於見行學令

一載才行為衆所知聽不次選正條初無衝改其前廊職事尤當以行藝

服衆為先今參照資格於上舍內舍通進行藝為衆所推人充庶幾人法

兩得從之二十四日詔就太學建造光堯太上皇帝御書石經閱其見

在石經周易毛詩尚書春秋左氏傳論語孟子外尚有太上皇帝御書禮

記中庸大學學記儒行經解五篇不係太學石經之教授訪舊章重行模

勒以補禮經之闕從知照安府趙儒老請也八月十三日禮部考試官施

師點等中易括等各赴太學上舍試委有妨礙本部欲候別試院開院了
畢別行差官鎖院引試從之 十一月二十七日禮部國子監言每遇科
舉年分諸州依解額取定合格人赴省試外乞將其餘解發不到試卷組
計終場人數每一百人取三人零分不及三十亦取一人名曰待補大學
生考試院具姓名中本州置籍俟太學開補本州給據申國子監赴補試
一次其以前曾實得解到省試下人願就補者各保官一員當年得解赴
省人只照元解解公據赴補從之先是監察御史潘輝言太學比年補試
繁冗太甚中選者類多假手欲自今秋科舉為始諸州依解額取定合格
試卷外仍取備卷作待補太學生即於經義詩賦論策內有兩場或一場
文理優長者並行存留許赴補一次其實曾得解人每補聽試禮部國子
監看詳未上政從其請至淳熙十年八月九日詔自今諸州解試終場人
以百人取六人充待補淳熙五年五月二十七日詔諸路州軍曾實請解
之人令禮部參詣貢籍仍各繳元省試下公據許補試一次 六月十三
日詔太學補試太院有合避親之人並送別院收試若別試而有避親孤
姪發回太院收試之人止避所避之官互送別院依公精加考校 八月
三日詔內舍校定優等不以有無上舍試年分並以十分為率先是開六

月二十三日臣僚言國家以科舉取士內舍上舍生兩優則月書季考積累之久行藝特異衆所推許有人則取無人則闕蓋十有餘年而不得一者今也不然兩優則以歲額為定纔五六分便為優選今乞兩優校定十分以上方得與選無人聽闕詔令禮部監學看詳禮部國子監言太學見行校定條令本無立定分數今乞將內舍校定若遇上舍試年優等以十分為率如非上舍試年優等以八分為率已上不及分數則闕之仍乞將每歲兩校人數依條例以往學年月及上舍公私試孟仲季入等高下相應若遇上舍試年優等及十分如非上舍試年優等及八分從上取兩名作優等餘並入中等庶幾得中 十月一日詔太學生年七十已上該慶壽數已補官人虞擬潘質季嘉言何上民並特差獄廟一次 六年九月二十七日詔國子監上舍試零分取一名 十月九日詔太學兩優釋褐之人與依狀元體例先此外任一次然後授以職事官以給事中王希昌言天子臨軒策天下之士取其尤異者一人曰狀元舍法選舉有司考校取其兩優者一人曰釋褐狀元雖一命得京官必出而為簽判而釋褐之人一命亦得京官即入為學官又賢良判入三等方任京官簽判入四等者止得選入幕官而宏辭中選者亦不過止得選人教授今兩優之人即

以京官而為學官釋褐之人方其未中也固嘗以學官為師矣一旦中選則與先生並列方其未中也固嘗以學錄學諭為師矣一旦中選則向之為師者反在此面弟子之列事之不當莫甚於此故有是命 十一月詔自今上舍試中兩優之人與依殿試第二名恩例既而知滁州張商卿言進士之第一人也必取之以簽判蓋欲其先歷州縣今上舍試中兩優者則便釋褐命之京秩處以學官不數年便可為監司郡守獄訟賦非所素習豈能保其不謬乞自今上舍兩優之人依殿試三名前體例且與資次法校幕職官一次候任滿日方與學官差遣庶便入仕之初稍更民事故有是命 七年七月九日詔自今國學程文依舊法從國子監長貳看詳可傳示學者方許離印從臣條請也 九年八月四日詔國子生今舉法併依前降指揮並送別院收試先是二年七月十一日詔自今國子生解試並別院收試其合避親嫌官不得差充別院考試官 九月十三日明堂赦國子監乾道八年省試下進士實理十二年可並與免文解 十年十二月十六日太上皇后慶壽赦太學內舍上舍生祖父父母年七十已上外舍生年八十已上並與封初品官婦人與封號已經官封者祖父父母轉一官資祖母母與冠帔令經所屬自陳保奏 淳熙十三年慶壽赦

同三十日禮部國子監言太學大小職事該遇慶壽赦參酌推恩人上舍
免省四名赴唱名日已有陞甲恩例候將來到部日與占射差遣一次內
舍生永免解三人即無恩例候將來過省殿試唱名日與陞甲上舍生永
免解一名已有陞甲恩例候將來過省赴殿試唱名日更與依格陞名內
舍生今舉得解一名即無恩例候將來過省赴殿試唱名日與陞甲內舍
生前舉免解今舉選試二名並無恩例候將來過省赴殿試唱名日與陞
甲上舍生未該免解一名係陞補未及一年候將來過省殿試唱名日已
有陞甲恩例與免文解內舍生永免文解八名外舍生永免文解二名並
無恩例候將來過省赴殿試唱名日與陞甲內舍生今舉得解見陳乞陞
補上舍填闕一名已有陞甲恩例候將來過省赴殿試唱名日更與依格
陞名內舍生今舉得解九名內舍生今舉選試一名並無恩例候將來過
省赴殿試唱名日與陞甲上舍生係陞補未及一年未免免省今舉不該
免解一名已有陞甲恩例欲與免文解內舍生未該免解一十四名外舍
生未該免解四名並無恩例並與免文解一次內三名陳乞該遇軍恩日
陞補內舍及在外學四年已上各承放行今次有試候將來過省赴殿試
唱名日與依格陞名學生五百八十四人各倍賜束帛詔並依擬定十

一年五月一日國子監言太學國子生二百六十八人闕額詔許依淳熙
 八年體例補試 十二年七月二十八日國子祭酒顏師魯言太學內舍
 生舊例歲校十人於十人之中以三人為優其後臣僚有請以優校之士
 間有六七分而得者似為稍易遂乞以十分為率從上止校二名分數既
 高士之銖積寸累偶應其格者比之往年固艱又從而損元額之一不亦
 甚乎且太學歲校三優率亦間歲再試視其中否尚有守年者今欲依舊
 與校優等三人仍以十分為率如不及則闕之庶知士知所勸上曰既限
 十分為率不必更減一名可依奏 十二月十一日詔太學上等上舍生
 易統顏敏名特補文林郎與職官差遣 十三年五月一日詔太學外舍
 生應統等十一人年七十以上並依慶壽校特與補迪功郎 八月四日
 臣僚言向來太學解試不差學官豈不曰月書季考習熟其文雖去取之
 間未必容私而眾多之口易以興榜日今科場差官在復乞復依舊例免
 差學官從之 十一月二十三日臣僚言近歲時創待補之法州郡俊秀
 羅網無遺惟是引試之期常以六月暑氣隆熾奔走道塗多有暈死有聞
 報罷之士人以試期尚遠力不能待且舊來太學補試用春秋二季衆皆
 便之因乾道八年再放補試始用六月循習為例今倘仍舊止舊三月引

試則省闈報罷者無留滯遺乏之憂天氣和平無觸冒炎暑之患貢院見
成夾截可以用就與殿試同月緣補試係學官自行考校與殿試不相
妨礙所有銓試却俟殿試唱名畢從之十四年正月二十二日禮部言
國學免解進士季元有國學進士盧獻臣等所陳欲依每舉放行省該所
該慶恩乞理作陞申緣昨未即次放行免解赴省並係承朝廷特降指揮
放行詔禮部將乾道八年至淳熙十一年已今赴省試人並時令再赴今
來省試一次其慶典免解俟過試特許作陞申收使既而四月五日禮部
國子監言元有陞錢震臣李履孫玟先慶典免解公據赴部投納試卷了
當欲將正月二十二日指揮放行免解公據換給陞申奉旨候過省日許
作陞申收使十五年五月十四日臣僚言竊見太學禮義之所教化所
自出諸生漸磨其間正宜勉勵術業重惜名檢以為保國榮親之舉近聞
有冒同宗之服制肆非所之燕遊若內舍生何寅者死於非命豈不負明
時之教養欲望戒敕太學師孺之官謹生員之教振舉學規勿容非禮之
動傳播四方有玷京師首善之化從之七月二十三日國子祭酒何澹
言竊惟太學興建之初月書季考未甚嚴密逮至紹興二十七年因本監
長貳申請始建指揮每月私試並依貢舉條制鎖院考校仍不得過十數

日內監試官引試終場畢先次出院候考校畢入院放榜自後每月率以
為常竊謂既依貢舉條例鎖院考校不應監試之官却乃先次出院只緣
在法監試取摘試卷詳定不預考校所以相承如此再詳法意蓋謂承平
學校養士額多就試人眾為長貳者難以遍閱試卷今來每月私試多不
過三百人以上長貳依貢舉條例鎖院考校亦自不難兼又臨期入院放
榜一時所見或未詳盡今乞向去私試如遇就試人多即長貳同共在內
更不先出如遇就試人少即長貳先放榜一日入院明日折號庶幾可以
子細看閱從之 十六年二月一日禮部言太學堂名上一字犯皇太子
名合行迴避乞改作崇化堂從之是年十一月二十八日右諫議大夫何
澹言竊見朝廷以舍法取士太學公試乃外舍士子陞進之階利害不細
常年則與銓試同在大院鎖院每遇省試年分則銓試多在中夏日子太
遲於是附試於省試之後而就大院別委官以考之所委官官往往以省
試為重以公試為輕又其披閱省試文卷之餘精力各以疲憊日子又復
迫捉未免鹵莽以求畢事緣此前後士子多不愜服欲望今後省試年分
所有太學公試令赴別院收試庶幾考官專精陞黜惟允契勘省試別院
卷子不多倒是先期開院今若就考公試實不相妨又來春大院免解赴

省之人異於常年重以考試公試力愈不給必致兩有所害移附別院尤為允當從之

宋會要元宗太學

紹熙元年正月十七日宰執進呈何澹乞放行太學參長假人免解留正等奏太學連兩舉該恩免解遂無科舉其僥倖不可言今參長假人多係赦後又欲盡行免解攀援冒濫何時而已上曰誠多僥倖卿等更參酌其間有可以放行者與放行不可者即已豈容一例放行也三年六月二十四日禮部侍郎倪思言國家開設太學所以網羅天下之材三歲一補所以收拾科舉之道自淳熙四年議者厭就試者之多乃創為待補之說蓋欲以限節其未者既少而取人之額如舊中選之人得以僥倖兩浙福建解額既窄住學亦便士子願一試而不可得則必巧為經營遠方之州解額自寬於補試無甚利害縱或得之住學亦非所便雖中待補第為虛名於是有所賣文帖改移鄉貫變易父祖之弊近時臣僚屢有以為言者可見此弊人皆知之不可以不革也臣以為不若自今舉罷去待補只循舊制每三歲放混試一次以廣其未取之額初不增加庶幾不絕士子進取之望而擇之既精得人必多如臣言可未更乞命侍從臺諫學官

集議施行又臣契勘向者就補試者至以萬計緣貢院狹窄若作一場則不能容若分作前後場則必有兩次就試之弊臣竊見近者臨安府轉運司各建立貢院若以經義詩賦分作兩處同日引試則無向者之患詔令集議既而侍御史林大中右正言胡瑑監察御史何異曾三復言國家開設大學本以混試招延士類混試既弊遂行侍補然關防之不密考校之不精抑又不能無弊此議臣所以有放行混試之請若以待補之弊尚多遺才所宜放行混試但來者既衆恐有喧闐蹂踐之患今若令有司措置保其無他即與權住今年諸州所取侍補然亦未宜徑罷也如明年場屋果無喧闐蹂踐則自放省試年分即與放行倘有未便則侍補既未嘗罷只就其間更加措置使關防之密考校之精未為不善也今若徑罷侍補萬一明年混試致有疎虞而後舉又復侍補恐非朝廷吏制主事之體又吏部尚書趙汝愚翰林學士李焞權兵部尚書羅點戶部侍郎馬大同給事中尤袤中書舍人黃裳權工部侍郎謝中甫起居郎張鑰起居舍人張叔椿言竊惟侍補之法其弊已多因仍歲時弊將益甚今欲易之混試固足取快一時然多士登來以數萬計非惟有司重有勞費日力有限較閱難精亦恐道路奔衝不無寒暑之患場屋湫隘更多蹂踐之虞彼此相形

得失居半蓋有根本之論稍始古始而言夫三代鄉舉里選之法雖世遠事異不可遽復然有教育作成之意本諸天地而合乎人情者則雖百世不能改也惟我國家內自京師外及郡縣皆置學校慶曆以後文物彬彬幾與三代同風矣逮至崇觀創行舍法可在養士誠得黨序之遺意故一時學者粗知防檢非冠帶不敢行於道路遇鄉曲之長上及學校之職事則敬容而避之其風俗亦誠美矣然其失也在於專習新義崇尚老莊廢黜春秋絕滅史學又罷去科舉使寒畯之士捨此無以為進身之路事理俱礙旋行廢革此亦非舍法之罪其時弊則然也中興以來復文講藝行郡重建太學諸郡復行貢舉士生斯時可謂幸矣然浮偽之風勝忠信之俗微有司頗以為病者亦由州縣之間士之榮辱進退皆不由乎學校至論德行道藝則惟取決於糊名苟為彫篆之文無復進修之志其視庠序有同傳舍視師儒幾若路人月書季考盡為文具殊失朝廷教養之意汝愚等擬欲速稽古制近酌時宜不煩朝廷建官不勞有司增費惟重教官之選假守貳之權倣舍法以育才因大比而貢士考終場之數定所貢之員期以次年試於太學庶幾士修實行不事虛文漸復淳風仰禪大化有三舍之利而無三舍之害其法頗為近古如家朝廷承錄所有諸州

教養課試升貢之法乞下有司詳議施行然科舉事嚴試期甫通其今歲
待補試欲乞且與依舊放行一次從之文獻通考時朱無門人或問三舍
法如何無曰欠去根頭理會若太學無非望之恩入於鄉舉額窄處增之
則人自安鄉里矣朱子語類錄先生曰太學舍法壞人多龜山嘗主論
高柳崇曾見龜山太學初興召為司業善類頗屬望到彼一切放倒三舍
法却在渠手中成壞負了龜山否王予合曰聞那時只是取法於一舊老
史浩曰泰會之是舊太學中人想是据他向日所見行了先生曰高公不
恰與永當高公大率不主五事皆有責責他文獻通考朱子學校貢舉
私議曰學校必選實有道德之人使為學官以來寄學之士裁減解額合
選謬濫之恩以塞利誘之塗蓋古之太學主於教人而回以取士故士之
未者為養而不為利且以本朝之事言之如李薦所記元祐侍講呂希哲
之言曰仁宗之時太學之法寬簡國子先生必承天下賢士真可謂人師
者就其中又擇其尤賢者如胡翼之之後使專教導規矩之事故當是時
天下之士不遠萬里來就師之其遊太學者端為道藝繩弟子者中心悅
而誠服之蓋猶有古法之遺意也熙寧以來此法浸壞所謂大學者但為
聲利之場而掌其教事者不過取其善為科舉之文而嘗得售於場屋者

耳士之有志於義理者既無求於學其奔趨相湊而未者不迫為解額之
濫舍選之私而已師生相視漠然如行路之人間相與言亦未嘗聞之以
德行道藝之實而月書季考者入祇以促其嗜利苟得冒昧無恥之心殊
非國家之所以立學教人之本意也欲革其弊莫若一遵仁皇之制擇師
之有道德可為人師者以為學官而久其任使之講明道藝以教訓其學
者而又痛減解額之濫以還諸州罷去舍選之法而使為之師者考察諸
州所解德行之士與諸州之賢者而特命以官則太學之教不為虛設而
彼懷利干進之流自無所為而至矣如此則待補之法固可罷去而混補
者又必使與諸州科舉同日引試則彼有鄉舉之可望者自不復來而不
忌其紛冗矣至於取人之數則又嚴為之額而許其補中之人從上幾分
時赴者試則其舍鄉舉而未赴補者亦不為甚失職矣其計會監試漕試
州試之類亦當痛減分級嚴立告賞以絕其冒濫其諸州教官亦以德行
人充而責以教導之責則州縣之學亦稍知義理之教而不但為科舉之
學矣 紹熙四年四月二日禮部言國子監申王松年等一十七人並係
試中上等小學生欲將逐人照紹興元年鄭樞等比類諸州待補試中名
額放行今未補試一次從之 四日詔令臨安府學生依紹熙元年已放

行人數許赴太學補試一次後府學生應補等請也五年正月一日慶壽
赦太學武學曾預拜表大小職事臨安府學正錄並依淳熙十年十二月
三十日已得指揮推恩人姓名開具應得恩數聞奏學生并有官學生各
倍賜束帛小學生府學生各賜束帛

宋會要

慶元元年四月九日權吏部尚書兼侍讀兼直學士院兼實錄院修撰樓
鑰等奏准慶元元年正月二十五日敕節文臣僚上言議覆太學混補以
示初政之優恩又謂待補之法行之稍久曷濫之弊不可不革今歲適當
大比乞令兩省侍從臺諫集議施行詔赴鑰等詳審臣僚乞用禮部貢院
之外以臨安府轉運司兩貢院添處之請因其說更加措置禮部貢院通
別試所約客一萬五千人臨安府轉運司兩貢院約可分投萬人今欲
以詩賦人盡於禮部貢院引試經義人臨時酌度人數徑分兩處收試仍
各差監察御史一員監試職事二員出題才候試畢封彌官即將真卷每
一百軸作一封仍取御史印押其出題官及簾外封彌監門等官徑自出
院御史親押上件已封卷子並赴禮部貢院封彌所就今日下各卷彌封
打號發過膳錄所一處膳錄混考御史候封彌所交收卷子盡地訖即自

出院如此則題目俱出於一而同日三處引試亦免重疊之弊俟來年省試畢日施行兼照得自來補試止係監學官考校今試卷倍多合從朝廷添差職事官以下同共考試其今年發解科場更不取待補人即合預先行下諸路轉運司遍牒州軍照應施行貼子稱舊法赴太學補試士人並令經本貫出給公據今未放行補試亦合行下照舊法給據施行詔從集議到事理施行 三年以國子生員多偽濫利自今職事官期親蔭務官子孫乃得補試凡監學生皆給綾牒若告謁在外遇科舉則試於漕司嘉定五年八月二十五日承議郎國子博士徐自明劄子奏學校舍法事數內至肄業膠庠者自外舍有月校而公試入等者曰內舍自內舍有月校而舍試入等者曰上舍有定序也然曩年省試係在孟春之中故大廷唱第多在孟夏之月近省試既在仲春故廷唱展在仲夏所以孟夏之月雖已中春官而未經廷對者猶未出學住膳而當年公試新中內舍者或未有關可填則不得以占三季之考行內舍之食其妨進取而礙月書學者常患苦之不惟是也一歲之中校優者三而校平者已常預平校者或再中平校止用其前者之一足矣而間有頑忍不予者或未肯與豁除必待授以遜狀是二者至有相邀以利相訐以訟啟紛爭而喪廉隅者風俗

至不美也今欲於省試之年其已中春官者遇入孟夏下旬即乞預行住膳使以次陞補者不妨以季行食而內舍已滿百三十人之數即不得於四月分先期借食又於每歲之中有再中平校者亦乞先與豁除使下名得以序進庶幾廣遜之風行彜事之俗熄不至陳學者之心術而啓學校之紛紜臣所謂嚴陞舍之選者此也如臣言可抹乞行下國子監看詳施行後批送國子監看詳限十日申尚書省本監尋送博士正錄看詳今據宣教郎太學博士陳貴誼等申教內至於舍法二弊諸生已中春官而未經廷對者當於四月下旬預先住膳所有特奏名候省試開院日行下諸齋根刷如願就特奏名試亦乞依此施行其前已中平校而復有平校者當於當年校定人數即與豁除其詳已備見於劄子所陳參之物論皆謂允協人情亦乞行下本監施行貴誼等今聚議申監乞備申朝廷施行本部今看詳欲從博士正錄看詳到事理施行伏乞朝廷指揮施行詔從國子監看詳到事理施行

宋續會要

卷一百一十五

據宣和二年八月五日指揮在京小學並依元豐法其起創月日檢未獲
徽宗大觀三年四月八日知樞密院鄭居中言修立到小學敕令格
式申明一時指揮已冠以大觀重修為名付禮部頒降詔第一卷內小學
能通經為文者為上等既不犯罰又五次合格令吏不赴本貫縣學試補
在學半年陞本學外舍生政和四年二月三日中書省言小學生見近
一千人入學者尚未已今來只有貢士教諭十人今欲分為十齋小學教
諭增與月俸給錢兩貫不許受束修從之據實錄宣和元年七月有差致
厚自國子小學錄為校書郎未見初置小學錄首擇十二月四日大司成
劉嗣明等言近降小學條制小學生八歲能誦一大經日書字二百補小
學內舍下等誦二經一大一小書字三百補小學內舍上等十歲加一大
經字一百補小學上舍下等十二歲以上又加一大經字二百補上舍上
等即年未及而能書誦及等者隨所及等補今欲季一試申監定日欲每
一大經挑三十通小經挑二十通及七分已上者為合格近降三舍法諸
學生能文而書誦不及等博士引試考其文理稍通與補內舍上等優者
補上舍下等今欲試本經義各一道丞封彌博士考校通否申監陞補大觀

重修國子監小學格職事人小長每教諭齋集正齋計同一八三十人以上增一人集正同從之五年五月二十日大司成馮熙載言試小學生合格優等四人詔曾芬駱度芝賜同上舍出身金時澤李徽賜童子出身並赴將來廷試宣和二年七月二十九日詔小學上舍上等特許起來年公試如合格與補大學外舍八月五日中書省言七月十九日聖旨在京小學近歲增立三舍其有害鄉舉里選奉旨可並依元豐法契勘元豐末在京小學止有就傳初筮兩齋差教諭一員即無立定官更并直學等今承指揮小學既罷三舍即無講解考選直學醫官等依元豐法自合更不差置乞置小學生兩齋於大學生內選差二人充教諭其俸給依元豐舊制詔依今後小學生數多令本監相度增撥齋舍